

全唐诗卷六百三十八

卷 638_1

【宴边将】张乔

一曲梁州金石清，边风萧飒动江城。
座中有老沙场客，横笛休吹塞上声。

卷 638_2

【郢州即事】张乔

孤城临远水，千里见寒山。
白雪无人唱，沧洲尽日闲。
鸟归残烧外，帆出断云间。
此地秋风起，应随计吏还。

卷 638_3

【送宾贡金夷吾奉使归本国】张乔

渡海登仙籍，还家备汉仪。
孤舟无岸泊，万里有星随。
积水浮魂梦，流年半别离。
东风未回日，音信杳难期。

卷 638_4

【华山】张乔

谁将倚天剑，削出倚天峰。
众水背流急，他山相向重。
树黏青霭合，崖夹白云浓。
一夜盆倾雨，前湫起毒龙。

卷 638_5

【滕王阁】张乔

昔人登览处，遗阁大江隅。
叠浪有时有，闲云无日无。
早凉先燕去，返照后帆孤。
未得营归计，菱歌满旧湖。

卷 638_6

【寄处士梁烛】张乔

贤哉君子风，讽与古人同。
采药楚云里，移家湘水东。
星霜秋野阔，雨雹夜山空。
早晚相招隐，深耕老此中。

卷 638_7



【送许棠下第游蜀】张乔

天下猿多处，西南是蜀关。
马登青壁瘦，人宿翠微闲。
带雨逢残日，因江见断山。
行歌风月好，莫老锦城间。

卷 638_8

【题终南山白鹤观】张乔

上彻炼丹峰，求玄意未穷。
坛青草合，往事白云空。
仙境日月外，帝乡烟雾中。
人间足烦暑，欲去恋松风。

卷 638_9

【赠边将】张乔

将军夸胆气，功在杀人多。
对酒擎钟饮，临风拔剑歌。
翻师平碎叶，掠地取交河。
应笑孔门客，年年羨四科。

卷 638_10

【吊建州李员外】张乔

铭旌归故里，猿鸟亦凄然。
已葬桐江月，空回建水船。
客传为郡日，僧说读书年。
恐有吟魂在，深山古木边。

卷 638_11

【送许棠及第归宣州】张乔

雅调一生吟，谁为晚达心。
傍人贺及第，独自却沾襟。
宴别喧天乐，家归碍日岑。
青门许攀送，故里接云林。

卷 638_12

【送庞百篇之任青阳县尉】张乔

都堂公试日，词翰独超群。
品秩台庭与，篇章圣主闻。
乡连三楚树，县封九华云。
多少青门客，临岐共羡君。

卷 638_13

【曲江春】张乔

寻春与送春，多绕曲江滨。



一片鳬鹭水，千秋辇毂尘。
岸凉随众木，波影逐游人。
自是游人老，年年管吹新。

卷 638_14

【秦原春望】张乔

无穷名利尘，轩盖逐年新。
北阙东堂路，千山万水人。
云离僧榻曙，燕远凤楼春。
荏苒文明代，难归钓艇身。

卷 638_15

【游华山云际寺（一作游少华山甘露寺）】张乔

少华中峰寺，高秋众景归。
地连秦塞起，河隔晋山微。
晚木蝉相应，凉天雁并飞。
殷勤记岩石，只恐再来希。

卷 638_16

【送棋待诏朴球归新罗】张乔

海东谁敌手，归去道应孤。
阙下传新势，船中覆旧图。
穷荒回日月，积水载寰区。
故国多年别，桑田复在无。

卷 638_17

【送郑谷先辈赴妆州辟命】张乔

看花兴未休，已散曲江游。
载笔离秦甸，从军过洛州。
嵩云将雨去，汝水背城流。
应念依门客，蒿莱满径秋。

卷 638_18

【赠敬亭清越上人】张乔

海上独随缘，归来二十年。
久闲时得句，渐老不离禅。
砌木欹临水，窗峰直倚天。
犹期向云里，别扫石床眠。

卷 638_19

【题灵山寺】张乔

树凉清岛寺，虚阁敞禅扉。
四面闲云入，中流独鸟归。
湖平幽径近，船泊夜灯微。



一宿秋风里，烟波隔捣衣。

卷 638_20

【吊栖白上人】张乔

今古递相送，几时无逝波。
篇章名不朽，寂灭理如何。
内殿留真影，闲房落贝多。
从兹高塔寺，惆怅懒经过。

卷 638_21

【北山书事】张乔

黄河一曲山，天半锁重关。
圣日雄藩静，秋风老将闲。
车舆穿谷口，市井响云间。
大野无飞鸟，元戎校猎还。

卷 638_22

【长安书事】张乔

出送乡人尽，沧洲未得还。
秋风五陵树，晴日六街山。
有景终年住，无机是处闲。
何当向云外，免老别离间。

卷 638_23

【送郑侍御赴汴州辟命】张乔

官从谏署清，暂去佐戎旌。
朝客多相恋，吟僧欲伴行。
河冰天际白，岳雪眼前明。
即见东风起，梁园听早莺。

卷 638_24

【吊造微上人】张乔

至人随化往，遗路自堪伤。
白塔收真骨，青山闭影堂。
钟残含细韵，烟灭有馀香。
松上斋乌在，迟迟立夕阳。

卷 638_25

【经隐岩旧居（一作怀旧游）】张乔

夜久村落静，徘徊杨柳津。
青山犹有路，明月已无人。
梦寐空前事，星霜倦此身。
尝期结茅处，来往蹑遗尘。

卷 638_26



【再题敬亭清越上人山房】张乔

重来访惠休，已是十年游。
向水千松老，空山一磬秋。
石窗清吹入，河汉夜光流。
久别多新作，长吟洗俗愁。

卷 638_27

【浮汴东归】张乔

日暖泗滨西，无穷岸草齐。
薄烟衰草树，微月迴城鸡。
水近沧浪急，山随绿野低。
羞将旧名姓，还向旧游题。

卷 638_28

【雨中宿僧院】张乔

千灯有宿因，长老许相亲。
夜永楼台雨，更深江海人。
劳生无了日，妄念起微尘。
不是真如理，何门静此身。

卷 638_29

【江行至沙浦】张乔

烟霞接杳冥，旅泊寄回汀。
夜雨雷电歇，春江蛟蜃腥。
城侵潮影白，峤截鸟行青。
遍欲探泉石，南须过洞庭。

卷 638_30

【送友人归江南】张乔

辛勤同失意，迢递独还家。
落日江边笛，残春岛上花。
亲安诚可喜，道在亦何嗟。
谁伴高吟处，晴天望九华。

卷 638_31

【刘补阙自九华山拜官因以寄献】张乔

冥鸿久不群，征拜动天文。
地主迎过郡，山僧送出云。
登车残月在，宿馆乱流分。
若更思林下，还须共致君。

卷 638_32

【岳阳即事】张乔

远色岳阳楼，湘帆数片愁。
竹风山上路，沙月水中洲。



力学桑田废，思归鬓发秋。
功名如不立，岂易狎汀鸥。

卷 638_33

【题兴善寺僧道深院】张乔

江峰峰顶人，受法老西秦。
法本无前业，禅非为后身。
院栽他国树，堂展祖师真。
甚愿依宗旨，求闲未有因。

卷 638_34

【送龙门令刘沧】张乔

去宰龙门县，应思变化年。
还将鲁儒政，又与晋人传。
峭壁开中古，长河落半天。
几乡因劝勉，耕稼满云烟。

卷 638_35

【送友人往宜春（一作江南）】张乔

落花兼柳絮，无处不纷纷。
远道空归去，流莺独自闻。
野桥喧碓水，山郭入楼云。
故里南陵曲，秋期更送君。

卷 638_36

【书边事】张乔

调角断清秋，征人倚戍楼。
春风对青冢，白日落梁州。
大汉无兵阻，穷边有客游。
蕃情似此水，长愿向南流。

卷 638_37

【送僧雅觉归东海】张乔

山川心地内，一念即千重。
老别关中寺，禅归海外峰。
鸟行来有路，帆影去无踪。
几夜波涛息，先闻本国钟。

卷 638_38

【和薛监察题兴善寺古松（薛一作崔）】张乔

种在法王城，前朝古寺名。
瘦根盘地远，香吹入云清。
鹤动池台影，僧禅雨雪声。
看来人旋老，因此叹浮生。



卷 638_39

【听琴】张乔

清月转瑶轸，弄中湘水寒。
能令坐来客，不语自相看。
静恐鬼神出，急疑风雨残。
几时归岭峤，更过洞庭弹。

卷 638_40

【送友人游蜀】张乔

此心知者稀，欲别倍相依。
无食拟同去，有家还未归。
巴山开国远，剑道入天微。
必恐临邛客，疑君学赋非。

卷 638_41

【闻仰山禅师往曹溪因赠】张乔

曹溪松下路，猿鸟重相亲。
四海求玄理，千峰绕定身。
异花天上堕，灵草雪中春。
自惜经行处，焚香礼旧真。

卷 638_42

【蓝溪夜坐】张乔

蓝水警尘梦，夜吟开草堂。
月临山霭薄，松滴露花香。
诗外真风远，人间静兴长。
明朝访禅侣，更上翠微房。



卷 638_43

【题郑侍御蓝田别业】张乔

秋山清若水，吟客静于僧。
小径通商岭，高窗见杜陵。
云霞朝入镜，猿鸟夜窥灯。
许作前峰侣，终来寄上层。

卷 638_44

【送友人进士许棠】张乔

离乡积岁年，归路远依然。
夜火山头市，春江树杪船。
干戈愁鬓改，瘴疠喜家全。
何处营甘旨，潮涛浸薄田。

卷 638_45

【秘省伴直】张乔

乔枝聚暝禽，叠阁锁遥岑。
待月当秋直，看书废夜吟。
残薪留火细，古井下瓶深。
纵欲抄前史，贫难遂此心。

卷 638_46

【宿昭应】张乔

夜忆开元寺，凄凉里巷间。
薄烟通魏阙，明月照骊山。
半壁空宫闭，连天白道闲。
清晨更回首，独向灞陵还。

卷 638_47

【送陆处士】张乔

樽前放浩歌，便起泛烟波。
舟楫故人少，江湖明月多。
孤峰经宿上，僻寺共云过。
若向仙岩住，还应著薜萝。

卷 638_48

【送韩处士归少室山】张乔

江外历千岑，还归少室吟。
地闲纡岭月，窗迥洛城砧。
石窦垂寒乳，松枝长别琴。
他年瀑泉下，亦拟置家林。

卷 638_49

【赠初上人】张乔

竹色覆禅栖，幽禽绕院啼。
空门无去住，行客自东西。
井气春来歇，庭枝雪后低。
相看念山水，尽日话曹溪。

卷 638_50

【送新罗僧】张乔

东来此学禅，多病念佛缘。
把锡离岩寺，收经上海船。
落帆敲石火，宿岛汲瓶泉。
永向扶桑老，知无再少年。

卷 638_51

【题山僧院】张乔

谿路曾来日，年多与旧同。
地寒松影里，僧老磬声中。



远水清风落，闲云别院通。
心源若无碍，何必更论空。

卷 638_52

【书梅福殿壁二首】张乔

梅真从羽化，万古是须臾。
此地名空在，西山云亦孤。
井痕平野水，坛级上春芜。
纵有双飞鹤，年多松已枯。
一自白云去，千秋坛月明。
我来思往事，谁更得长生。
雅韵磬钟远，真风楼殿清。
今来为尉者，天下有仙名。

卷 638_53

【荆楚道中】张乔

前程曾未到，岐路拟何为。
返照行人急，荒郊去鸟迟。
春宵多旅梦，夏闰远秋期。
处处牵愁绪，无穷是柳丝。

卷 638_54

【送南陵尉李频】张乔

重作东南尉，生涯尚似僧。
客程淮馆月，乡思海船灯。
晚雾看春毂，晴天见朗陵。
不应三考足，先授诏书征。



卷 638_55

【将归江淮书（一作冬归有感）】张乔

东风摇众木，即有看花期。
紫陌频来日，沧洲独去时。
郡因兵役苦，家为海翻移。
未老多如此，那堪鬓不衰。

卷 638_56

【沿汉东归】张乔

北去穷秦塞，南归绕汉川。
深山逢古迹，远道见新年。
绝壁云衔寺，空江雪洒船。
萦回还此景，多坐夜灯前。

卷 638_57

【送蜀客】张乔

剑阁缘空去，西南转几州。
丹青行客语，明月杜鹃愁。
露带山花落，云随野水流。
相如曾醉地，莫滞少年游。

卷 638_58

【塞上（一作塞下曲）】张乔

勒兵辽水边，风急卷旌旃。
绝塞寒无树，平沙势尽天。
雪晴回探骑，月落控鸣弦。
永定山河誓，南归改汉年。

卷 638_59

【送友人归袁州】张乔

袁江猿鸟清，曾向此中行。
才子登科去，诸侯扫榻迎。
山藏明月浦，树绕白云城。
远想安亲后，秋风梦不惊。

卷 638_60

【赠别李山人】张乔

分合老西秦，年年梦白蘋。
曾为洞庭客，还送洞庭人。
语别惜残夜，思归愁见春。
遥知泊舟处，沙月自相亲。

卷 638_61

【思宜春寄友人】张乔

胜游虽隔年，魂梦亦依然。
瀑水喧秋思，孤灯动夜船。
断虹全岭雨，斜月半溪烟。
旧日吟诗侣，何人更不眠。

卷 638_62

【江行夜雨】张乔

江风木落天，游子感流年。
万里波连蜀，三更雨到船。
梦残灯影外，愁积苇丛边。
不及樵渔客，全家住岛田。

卷 638_63

【赠仰大师】张乔

仰山因久住，天下仰山名。
井邑身虽到，林泉性本清。



野云居处尽，江月定中明。
仿佛曾相识，今来隔几生。

卷 638_64

【江南逢洛下友人】张乔

洛下吟诗侣，南游只有君。
波涛归路见，蟋蟀在船闻。
晓月江城出，晴霞岛树分。
无穷怀古意，岂独绕湘云。

卷 638_65

【东湖赠僧子兰（一作题兰上人）】张乔

名利了无时，何人暂访师。
道情闲外见，心地语来知。
竹落穿窗叶，松寒荫井枝。
匡山许同社，愿卜挂帆期。

卷 638_66

【隐岩陪郑少师夜坐】张乔

幸喜陪驺驭，频来向此宵。
砚磨清涧石，厨爨白云樵。
竹外村烟细，灯中禁漏遥。
衣冠与文理，静语对前朝。

卷 638_67

【送三传赴长城尉（一作送前辈读三传任长城尉）】张乔

登科精鲁史，为尉及良时。
高论穷诸国，长才并几司。
地倾流水疾，山叠过云迟。
暇日琴书畔，何人对手棋。

卷 638_68

【送李道士归南岳】张乔

千峰隔湘水，迢递挂帆归。
扫月眠苍壁，和云著褐衣。
洞虚悬溜滴，径狭长松围。
只恐相寻日，人间旧识希。

卷 638_69

【延福里秋怀】张乔

终年九陌行，要路迹皆生。
苦学犹难至，甘贫岂有成。
病携秋卷重，闲著暑衣轻。
一别林泉久，中宵御水声。

卷 638_70

【题玄哲禅师影堂】张乔

吾师视化身，一念即遗尘。
岩谷藏虚塔，江湖散学人。
云迷禅处石，院掩写来真。
寂寞焚香后，闲阶细草生。

卷 638_71

【登慈恩寺塔】张乔

窗户几层风，清凉碧落中。
世人来往别，烟景古今同。
列岫横秦断，长河极塞空。
斜阳越乡思，天末见归鸿。

卷 638_72

【送友人东归】张乔

远涉期秋卷，将行不废吟。
故乡芳草路，来往别离心。
挂席春风尽，开斋夏景深。
子规谁共听，江月上清岑。

卷 638_73

【送僧鸾归蜀宁亲】张乔

歌诗精外学，天子是知音。
坐夏宫钟近，宁亲剑阁深。
高名彻西国，旧迹寄东林。
自此栖禅者，因师满蜀吟。

卷 638_74

【送人归江南】张乔

贫归无定程，水宿与山行。
未有安亲计，难为去国情。
岛烟孤寺磬，江月远船筝。
思苦秋回日，多应吟更清。

卷 638_75

【将离江上作】张乔

白衣归树下，青草恋江边。
三楚足深隐，五陵多少年。
寂寥闻蜀魄，清绝怨湘弦。
岐路在何处，西行心渺然。

卷 638_76

【别李参军】张乔

王孙游不遇，况我五湖人。
野店难投宿，渔家独问津。
岭分中夜月，江隔两乡春。
静想青云路，还应寄此身。

卷 638_77

【送睦州张参军】张乔

重禄轻身日，清资近故乡。
因知送君后，转自惜年芳。
远水分林影，层峰起鸟行。
扁舟此中去，溪月有余光。

卷 638_78

【赠棋僧侣】张乔

机谋时未有，多向弈棋销。
已与山僧敌，无令海客饶。
静驱云阵起，疏点雁行遥。
夜雨如相忆，松窗更见招。

卷 638_79

【题湖上友人居】张乔

岂得恋樵渔，全家湖畔居。
远无潮客信，闲寄岳僧书。
野白梅繁后，山明雨散初。
逍遥向云水，莫与宦情疏。

卷 638_80

【送友人归宣州】张乔

失计复离愁，君归我独游。
乱花藏道发，春水绕乡流。
暝火丛桥市，晴山叠郡楼。
无为谢公恋，吟过晓蝉秋。

卷 638_81

【题古观】张乔

急景递衰老，此经谁养真。
松留千载鹤，碑隔六朝人。
洞水流花早，壶天闭雪春。
其如为名利，归踏五陵尘。

卷 638_82

【送友人及第归江南】张乔

岂易及归荣，辛勤致此名。
登车思往事，回首勉诸生。

路绕山光晓，帆通海气清。
秋期却闲坐，林下听江声。

卷 638_83

【送朴充侍御归海东】张乔

天涯离二纪，阙下历三朝。
涨海虽然阔，归帆不觉遥。
惊波时失侣，举火夜相招。
来往寻遗事，秦皇有断桥。

卷 638_84

【吊前水部贾员外】张乔

笼中江海禽，日夕有归心。
魏阙长谣久，吴山独往深。
别时群木落，终处乱猿吟。
李白坟前路，溪僧送入林。

卷 638_85

【题小松】张乔

松子落何年，纤枝长水边。
斫开深涧雪，移出远林烟。
带月栖幽鸟，兼花灌冷泉。
微风动清韵，闲听罢琴眠。

卷 638_86

【寄中岳颢顼先生】张乔

先生颢顼后，得道自何人。
松柏卑于寿，儿孙老却身。
夜窗峰顶曙，寒涧洞中春。
恋此逍遥境，云间不可亲。

卷 638_87

【送沈先辈尉昭应】张乔

馀才不废诗，佐邑喜闲司。
丹陛终须去，青山未可期。
叶凋温谷晚，云出古宫迟。
若草东封疏，君王到有时。

卷 638_88

【送友人游湖南】张乔

所投非旧知，亦似有前期。
路向长江上，帆扬细雨时。
春生南岳早，日转大荒迟。
尽采潇湘句，重来会近期。

卷 638_89

【江上送友人南游】张乔

何处积乡愁，天涯聚乱流。
岸长群岫晚，湖阔片帆秋。
买酒过渔舍，分灯与钓舟。
潇湘见来雁，应念独边游。

卷 638_90

【江南别友人】张乔

劳生故白头，头白未应休。
阙下难孤立，天涯尚旅游。
听猿吟岛寺，待月上江楼。
醉别醒惆怅，云帆满乱流。

卷 638_91

【商山道中】张乔

春去计秋期，长安在梦思。
多逢山好处，少值客行时。
云起争峰势，花交隐涧枝。
停骖一惆怅，应只岭猿知。

卷 638_92

【吴江旅次】张乔

行人愁落日，去鸟倦遥林。
旷野鸣流水，空山响暮砧。
旅途归计晚，乡树别年深。
寂寞逢村酒，渔家一醉吟。

卷 638_93

【寄南中友人】张乔

相梦如相见，相思去后频。
旧时行处断，华发别来新。
浪动三湘月，烟藏五岭春。
又无归北客，书札寄何人。

卷 638_94

【寄绩溪陈明府】张乔

古邑猿声里，空城只半存。
岸移无旧路，沙涨别成村。
鼓角喧京口，江山尽汝滨。
六朝兴废地，行子一销魂。

卷 638_95

【试月中桂】张乔

与月转洪濛，扶疏万古同。
根非生下土，叶不坠秋风。
每以圆时足，还随缺处空。
影高群木外，香满一轮中。
未种丹霄日，应虚玉兔宫。
何当因羽化，细得问玄功。

卷 638_96

【游歙州兴唐寺】张乔

山桥通绝境，到此忆天台。
竹里寻幽径，云边上古台。
鸟归残照出，钟断细泉来。
为爱澄溪月，因成隔宿回。

卷 638_97

【题谿律师院】张乔

院凉松雨声，相对有山情。
未许谿边老，犹思岳顶行。
纱灯留火细，石井灌瓶清。
欲问吾师外，何人得此生。

卷 638_98

【金山寺空上人院】张乔

已老金山顶，无心上石桥。
讲移三楚遍，梵译五天遥。
板阁禅秋月，铜瓶汲夜潮。
自惭昏醉客，来坐亦通宵。

卷 638_99

【题广信寺】张乔

亭北敞灵溪，林梢与槛齐。
野云来影远，沙鸟去行低。
晚渡明村火，晴山响郡鼙。
思乡值摇落，赖不有猿啼。